



REPUBLIKA E KOSOVËS/REPUBLIKA KOSOVA

GJYKATA THEMELORE GJILAN

Numri i lëndës: 2019:263301

Datë: 30.11.2020

Numri i dokumentit: 01305705

**C.nr.1004/19**

**Gjykata Themelore në Gjilan Departamenti i Përgjithshëm-Divizioni Civil**, me gjyqtarin Blerim Beshtica dhe bashkëpunëtorin profesional Baki Sylejmani, në çështjen juridike të paditëses KEP TRUST, dega në Gjilan, Rr. “Esat Berisha”, pa nr.”, ndaj të paditurve N.Xh. dhe E.Xh. nga fshati ..., Komuna e Gjilanit, me objekt kontesti pagim borxhi nga Marrëveshja Mbi Kredinë, vlera e kontestit 2,521.19€, jashtë seancës gjyqësore, më datën 11.11.2020 mori këtë:

**A K T G J Y K I M**  
**PËR SHKAK TË PADËGJUESHMËRISË/MOSBINDJES/**

**I. APROVOHET** si e bazuar kërkesëpadia e paditëses KEP TRUST – dega në Gjilan dhe **DETYROHEN** të paditurit N.Xh. dhe E.Xh. nga fshati .., Komuna e Gjilanit, që paditëses t’ia kthjenë-paguajnë borxhin në shumën prej 2,521.19€, (dymijë e pesëqindë e njëzetë e nje euro e nëntëmbëdhjetë cent), me kamatë ligjore prej 8%, duke llogaritur nga data 13.11.2019 e deri në pagesën përfundimtare, të gjitha këto në afat prej 15 ditës, pas plotfuqishmërisë së këtij aktgjykimi, nën kërcënim të përmbarimit të dhunshëm.

**II. DETYROHEN** të paditurit që paditëses t’ia paguajnë shpenzimet gjyqësore në emër të taksës gjyqësore në shumë prej 40 €, të gjitha këto në afat prej 15 ditës, pas plotfuqishmërisë së këtij aktgjykimi, nën kërcënim të përmbarimit të dhunshëm.

**A r s y e t i m**

Paditësja, KEP TRUST, dega në Gjilan në këtë gjykatë më datën 13.11.2019, ka paraqitur padi kundër të paditurëve, për pagimin-kthimin e borxhit në shumën prej 2,521.19€, (dymijë e pesëqindë e njëzetë e një euro e nëntëmbëdhjetë cent), me kamatë ligjore prej 8%, duke llogaritur nga data 13.11.2019 e deri në pagesën përfundimtare, të gjitha këto në afat prej 15 ditës, pas plotëfuqishmërisë së këtij aktgjykimi, nën kërcënim të përmbarimit të dhunshëmsi dhe ka kërkuar shpenzimet e procedurës gjyqësore. Sipas pretendimeve të paditësit, të paditurit nuk i kanë përmbushur detyrimet e pagesës së borxhit nga Marrëveshja mbi Kredinë edhe përkundër vërejtjes nga pala paditëse për përmbushjen e këtij detyrimi. I ka propozuar gjykatës që pas adminsitimit të provave ta aprovojë kërkesëpadinë.

Gjykata në këtë çështje juridike kontestimore, pas shqyrtimit paraprak të padisë ka nxjerrë aktvendimin C.nr.1004/19, të cilin të paditurit e kanë pranuar me dt.02.12.2019, përkatësisht me datën 04.12.2020 e cila datë është konfirmuar përmes fletëkthesës e cila gjendet në shkresat e lëndës. Me aktvendimin për përgjigje në padi, gjykata e ka njoftuar të paditurit për detyrimin ligjor për dhënie të përgjigjes në padi dhe për pasojat ligjore që do t’i kenë të njëjtit nëse nuk paraqesin përgjigje në padi brenda afatit ligjor, përkatësisht për mundësinë që gjykata të marrë aktgjykim për shkak të mosbindjes në disfavor të tyre.

Të paditurit, pavarësisht se e kanë pranuar personalisht aktvendimin për përgjigje në padi, së bashku me padinë dhe provat materiale në këtë çështje juridike kontestuese, nuk kanë paraqitur përgjigje në padi brenda afatit ligjor.

Gjykata, pasi i ka vlerësuar kushtet ligjore për nxjerrjen e aktgjykimit për shkak të mosbindjes, ka gjetur se në rastin konkret plotësohen të gjitha kushtet ligjore për nxjerrjen e aktgjykimit në fjalë nga neni 150, par. 1, pikat a), b) dhe c) të LPK-së, në të cilën dispozitë shprehimisht parashihet se *“Në qoftë se i padituri, brenda afatit të përcaktuar me këtë ligj, nuk e paraqet në gjykatë përgjigjen në padi, gjykata jep aktgjykim me të cilin e aprovon kërkesëpadinë (aktgjykimi për shkak të mosbindjes) po që se janë plotësuar këto kushte: a) po që se të paditurit i është dorëzuar rregullisht padia dhe thirrja për dhënien e përgjegjës në padi; b) po që se themelësia e kërkesëpadisë del nga faktet e treguara në padi; c) po që se faktet mbi të cilat mbështetet kërkesëpadia nuk janë në kundërshtim me provat që i ka propozuar vet paditësi apo me faktet e ditura botërisht.”*

Gjykata nga provat që i janë bashkangjitur padisë e ka vërtetuar faktin se të paditurit me paditësen me datën 11/10/2017, kanë nënshkruar Marrëveshjen Për Kredinë në shumë prej 4,200.00€, me detyrimin që të paguhet për 40 muaj në këste mujore, duke përfshirë edhe shkallën vjetore të interesit prej 21.00 % në vjet, e cila është rënëse gjatë gjithë periudhës së kredisë. Fakt ky i vërtetuar me Marrëveshjen Mbi Kredinë Nr. KOFE – 010064-006, e gjithashtu kthimi i kredisë nuk është bërë në afatet e parapara dhe paditësja edhe përkundër vërejtjeve që ju ka bërë të paditurve të njëjtit nuk e kanë përmbushur detyrimin, ashtu që paditësja është detyruar që të paraqesë këtë padi ku përfundimisht me datën 13/11/2017/, borxhi i mbetur i pa paguar i të paditurëve ka mbetur në shumë prej 2,521.19€, ku 2,358.35 përbën kryegjën, 157.22 € interesin e rregullt dhe 5,62 € kamatvonesë.

Gjykata në kuptim të dispozitave të cekura ligjore nga neni 150 i LPK-së, e në lidhje me dispozitat nga neni 245, paragrafi 1 LMD-së i Republikës së Kosovës, Nr. 04/L-077, ku përcaktohet se *“Kreditori në marrëdhënien e detyrimit ka të drejtë që prej debitorit të kërkojë përmbushjen e detyrimit, ndërsa debitori ka për detyrë ta përmbushë ate me ndëgjegje dhe në tërësi, në përputhje me përmbajtjen e tij”* gjeti se kërkesëpadia e paditëses është bazuar dhe vendosi si në pikën I të dispozitivit të këtij aktgjykimi.

Andaj, nga të lartëcekurat gjykata gjeti se kërkesëpadia e paditëses është e bazuar dhe vendosi si në dispozitiv të këtij aktgjykimi.

Gjykata vendosi për kamatë ligjore prej 8%, duke u mbështetur në dispozitën e nenit 282 të LMD/ Nr. 04/L-077/ i vitit 2012.

Vendimi që të paditurit t'i bartin shpenzimet e procedurës, gjykata e ka mbështetur në dispozitën ligjore në mbështetje të nenit 449 dhe 452 të Ligjit të Procedurës Kontestimore. Lartësia e këtyre shpenzimeve të aprovuara i referohet tarifës për padi në shumë prej 40 € .

Duke u bazuar në të dhënat e lartshënuara gjykata ka vendosur si në dispozitiv të këtij aktgjykimi.

**Gjykata Themelore në Gjiilan-Departamenti i Përgjithshëm  
C.nr.1004/19 më datën 11.11.2020**

**Gjyqtari,**  
Blerim Beshtica d.v.

**KËSHILLA JURIDIKE:** Kundër këtij aktgjykimi pala e pakënaqur mund të paraqesë ankesë në Gjykatën e Apelit të Kosovës në Prishtinë, në afat prej 15 ditëve nga dita e pranimit të të njëjtit. Ankesa në kopje të mjaftueshme dorëzohet përmes kësaj Gjykate.

Numri i lëndës: 2019:263301  
Datë: 30.11.2020  
Numri i dokumentit: 01305705